

1/3/2012

Pemandu teksi Malaysia dipenjara di Shiraz, Iran

Oleh UMAVATHI RAMAYAH

uma.ramayah@utusan.com.my

KUALA LUMPUR 29 Feb. - Gara-gara termakan pujukan seorang lelaki warga Nepal yang menawarkan pekerjaan di luar negara, seorang pemandu teksi lelaki rakyat tempatan kini terpaksa meringkuk di penjara Adel Abad, Shiraz, Iran.

Mangsa berusia 40 tahun ditahan di Lapangan Terbang Shiraz pada tahun 2010 kerana kesalahan cuba menyeludup keluar tiga kilogram dadah jenis kokain dalam sebuah kotak yang dimuatkan dalam beg mangsa.

Sumber memberitahu, mangsa hanya mengenali lelaki Nepal itu sebulan sebelum kejadian tersebut berlaku ketika dia menaiki teksinya di ibu negara.

Menurut sumber, mangsa dijanjikan dengan gaji lumayan tetapi dengan syarat perlulah membawa sebuah kotak kononnya berisi barang berharga dari Shiraz ke Malaysia.

"Mangsa yang tidak mencurigai lelaki itu hanya menuruti kehendaknya namun semasa hendak keluar untuk ke Malaysia, dia ditahan pihak penguat kuasa Lapangan Terbang Shiraz," katanya ketika ditemui *Utusan Malaysia* di sini hari ini.